

Uunga siunnersuut: Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarnerat pillugu inatsisartut inatsisaata allanngortinnera pillugu Inatsisartut inatsisaat (Silap pissusianik pissuteqartumik ajornartorsiornerne ajunaarnersuarnullu assingusuni pisuni aallarteqqinnissamut tapiissutisisinnaaneq, akiliutigineqartartut qaffanneri kiisalu qinnuteqarnermi piffissaliussat eqqunneqarneri)

Aalisarnermut Piniarnermullu Naalakkersuisumit saqqummiunneqartoq

pillugu

Aalisarnermut, Piniarnermut Nunalerinermullu Ataatsimiititaliap

siunnersuutip aappassaaneerreqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Kristian Jeremiassen, Inuit Ataqtigiit, siulittaasoq

Inatsisartunut ilaasortaq Jens Nap̃tôk', Naleraq, siulittaasup tullia

Inatsisartunut ilaasortaq Adam Kristensen, Inuit Ataqtigiit

Inatsisartunut ilaasortaq Mikivsuk Thomassen, Inuit Ataqtigiit

Inatsisartunut ilaasortaq Jens Kristian Therkelsen, Siumut

Inatsisartunut ilaasortaq Karl Tobiassen, Siumut

Inatsisartunut ilaasortaq Aqqalu C. Jerimiassen, Atassut

UKA2024-mi ulloq 3. oktoberimi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Siunnersuut Inatsisartut aalajangiiffigisassaattut siunnersuummik UKA2023/62-imik aallaaveqarpoq. Silap pissusianik pissuteqartumik ajornartorsiornerne ajunaarnersuarnullu assingusumik pisoqarnerani aallarteqqinnissamut tapiissutisisinnaanermut periarfissat pitsaanerulersinneqarnissaat siunnersuutip matumani pineqartup ilaatigut siunertaraa. Piffissamut killiliineq atuutsinneqassaaq, taamaalilluni tapiiffigineqartoq ajutoornerup

assinganut ukiut tamaasa tapiissutinik pissarsisinnaajunnaassalluni kiisalu toqqaannartumik ajoqusernertut qinnuteqarnissaminut ullunik 30-nik piffissaqartinneqalissalluni. Akiliutigineqartartut amerlanerpaaffissaat 25.000 kr.-init 50.000 kr.-inut qaffanneqassaaq. Akiliutigineqartartut qinnuteqartup isertitai naapertorlugit tunniunneqartarnissaannut piunasaqaatit atuutsinneqalissapput.

Siunnersuutip Inatsisartunit siullermeerneqarnera

Siullermeerinninnermi inersuarmi partiinit amerlanerussuteqartut inatsisissatut siunnersuummut matumani pineqartumut ataatsimut isigalugu tapersiipput. Siammasissumik oqallisigineqarpoq siunnersuummilu pissutsit ilaat siunnersuutip Aalisarnermut, Piniarnermut Nunalerinermullu Ataatsimiititaliamit suliarineqaaqqittussanngorlugu innersuunneqarnissaanut pissutissaqalersitsipput.

Tusarniaanermut akissutit

Siunnersuut piffissami 2024-mi 11. julimit 8. augustip tungaanut tusarniaassutigineqartoq Naalakkersuisut paasissutissiissutigaat. Tusarniaanermut akissutit inatsisissatut siunnersuummut ilanngunneqarput, tamannalu iluserititassatut piunasaqaatinut naapertuuppoq.

Apeqqutit

Ataatsimiititaliap siunnersuummik suliarinninnermini atugassatut apeqqutit arlallit akissuteqarfigeqqullugit Aalisarnermut Piniarnermullu Naalakkersuisoq qinnuigaa. Ataatsimiititaliap apeqqutaasa akissuteqaatillu assilineri isumaliutissiissummut matumunnga ilanngussaq 1-itut ilanngunneqarput.

Ataatsimiititaliap siunnersuummik suliarinninnera

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugu nunalerinermik ingerlataqartut silap pissusianik pissuteqartumik ajornartorsiornerni ajunaarnersuarnullu assingusunik pisoqartillugu tapiiffigineqartarnissaat ataatsimut isigalugu pingaaruteqartoq ataatsimiititaliaq isumaqarpoq. Silap pissusianik pissuteqartumik pissutsit allanngorartuupput aammalu pissutsit soorlu aperujussuarternera, sikunaveertarnera, anorersartuarternera assigisaallu inuussutissarsiutinut siunissami aamma ajornartorsiortitsisinnaassapput.

Akiliutigineqartartut qaffanneqarnissaat ataatsimiititaliamit tapersorsornartinneqarpoq, tassa ilaatigut atortut nerukkaatissallu akii aningaasat naleeerukkiartornerat malillugu qaffassimmata, tamannalu inuussutissarsiortunut imminnut pilersortunut annertoorujussuarmik sunniuteqarluni.

Aningaasat annerpaaffissaat aallarteqqinnissamullu tapiissutinik tunineqarnissamut

piumasaqaatit siunnersuutip siullermeerneqarnerani oqallisigineqartut ataatsimiititaliamit maluginiarneqarpoq. Aallarteqqinnissamut tapiissutinik tunniussisarneq aalajangersimasumik missingiinikkut pisassasoq qinnuteqartorlu inuussutissarsiummut sillimmasernissamut pisarialimmik nammineq aningaasaateqanngippat tapiissutit tunniunneqarsinnaassasut siunnersuummi matumani pineqartumi siunnersuutigineqarpoq.

Tamatuma saniatigut inuussutissarsiutigalugu aalisartoq, inuussutissarsiutigalugu piniartoq inuussutissarsiutigaluguluunniit nunalerinermik ingerlataqartoq qinnuteqarneq sioqqullugu ukiuni pingasuni 1) ukiumut agguaqatigiissillugu 250.000 kr.-nik ataallugilluunniit isertitaqassasoq aamma 2) agguaqatigiissillugu 100.000 kr.-nik ataallugilluunniit nalilinnik pigisaqassasoq piumasaqaataassaaq.

Taakku ataatsimiititaliamit oqaluuserineqarput aammalu taakku pillugit Naalakkersuisunut allakkatigut apeqqutinik ataatsimiititaliaq nassiussaqluni.

Aningaasanut killissarititat peerneqarnissaannut periarfissat misissoqqullugit Naalakkersuisut ataatsimiititaliamit isumaqatigiittumit kaammattorneqarput.

Inatsisip piviusunngortinneqarnera naapertorlugu allannguutit atuutilersinneqarnerat malillugu Naalakkersuisut paasititsiniaanermik ingerlatseqqullugit kaammattorneqarnissaat siullermeerinermi kissaatigineqartoq ataatsimiititaliamit maluginiarneqarpoq, tamatumani inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut inatsisip atuuffia pillugu paasitinneqassallutik kiisalu qinnuteqariaaseq pillugu ilitersorneqarlutik.

Taamatuttaaq inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut ataatsimut isigalugu sillimmasiissutaat, taarsigassarsinissamut periarfissaat tapiiffigineqarnissamullu periarfissaat siullermeerinnilluni oqallinnermi aamma eqqartorneqartut ataatsimiititaliamit maluginiarneqarpoq.

Inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut allatut tapiiffigineqarsinnaanerannut periarfissat ataatsimiititaliamit oqaluuserineqarput. Tassunga ilanngullugu taarsigassarsinissamut periarfissartalimmik aningaasaateqarfimmit pilersitsinissamut kiisalu inuussutissarsiummut atortutut ilusilerlugit tapiissuteqartoqarsinaanerani ammaassisoqarnissaa oqaluuserineqarlutik.

Aningaasaateqarfimmik inuussutissarsiutigalugu aalisartunut, inuussutissarsiutigalugu piniartunut inuussutissarsiutigalugulu nunalerinermik ingerlataqartunut taarsigassarsilluni aningaasalersuinissamut periarfissiisumik pilersitsinissamut periarfissat isumaliutigeqqullugit Naalakkersuisut ataatsimiititaliamit isumaqatigiittumit kaammattorneqarput.

Siunnersuutip aningaasaqarnikkut kingunerisassai

Siunnersuutip piviusunngortinneratigut aningaasaqarnikkut kingunerisassat siunnersuummut nalinginnaasumik oqaaseqaatit ataanni nassuiaatigineqarput.

Ataatsimiititaliap inassuteqaatai

Siunnersuut akuerineqassasoq ataatsimiititaliamit isumaqatigiittumit inassutigineqarpoq.

Ataatsimiititaliap taama oqaaseqaateqarluni isumaliutissiisummilu allassimasutut paasinnil-
luni inatsisissatut siunnersuut aappassaaniigassanngortippaa.

Kristian Jeremiassen
Siulittaasoq

Jens Napātók’
Siulittaasup tullia

Adam Kristensen

Mikivsus Thomassen

Jens Kristian Therkelsen

Karl Tobiassen

Aqqalu C. Jerimiassen